

Халунар тосджацхана

1956-ч джилин дунд болн
1957-ч джилин эклцяр эврәннь
төрскн газрурн ирдж кесг халь-
мг өрк-бүл төвкнв.

Альд болв чигн, теднә ирсн
газрнь—колхозмуд, совхозмуд
эн улсиг икәр күндлдж, сән
кевәр тосдж авб.

Хальмг улсла хамдан, ах-дү
мет өсдж-боссн бәәрн бәәсн улс
хальмг улсиг аль-бис кәдлмш-
тән, нег үлү малин туск кәд-
лмшт эвтәгъинь сәәнәр медцхә-
нә. Үлгүринь келхд, Целинн
района „Ленинск“ совхозд бо-
лн „Родина“ гидг колхозд
1956-ч джил гучагъад-дөчәгъад
өрк-бүлс ирдж төвкнцхәв. Тер
ирсн улст эн колхоз, совхоз
хойр чидлән күрмәрн дөнъ-нө-
кдән күргәд, зәрм өрк-бүлднъ
сул бәәсн гермүдән өгәд, зәрм-

синь у гертә улсин өрәсд ору-
лад, байрта кевәр эврәннь кол-
хозн, совхозн бүлдән орулдж
авцхав.

Эн өмнь ирсн хальмгуд цу-
гъар шундж кәдлджәцхәнә.
Тедн дотр „Родина“—колхозин
ах хөөч Сангаджиев Церн,
„Ленинск“ совхозин ах хөөч
Кодлаев болн нань чигн кесг
әмтс кәдлмшән йилгъән сәәнәр
кеджәцхәнә.

Хаврин түрүгъәр нүүдж ирх
хальмгудт „Родина“ гидг кол-
хоз зун гер бәрхәр терз-үүдинь,
хулсинь бел кечксн бәәнә.

Эн колхоз совхоз хойр улм
цааранднъ ирсн улсин бәәринь
икдүлдж ясхин төләд гермүд
бәрх хулс, чолу, кирпич цокдж
бел кеджәцхәнә.

А. БАЙДЫЕВ.